

AWIG - AWIG DESA ADAT NAGI



**DESA PETULU
KECAMATAN UBUD
KABUPATEN GIANYAR
TAHUN 2000**

P I D A G I N G

MAKA BANTANG AWIG-AWIG DESA ADAT NAGI

MURDDHA - CITTA

	WIDANG
PRATHAMA SARGAH ARAN LAN WAWIDANGAN DESA	1
DWITYA SARGAH PATITIS LAN PAMIKUKUH	2
TRITYA SARGAH SUKERTA TATA PAKRAMAN	2
Palet 1 Indik Krama	2
Palet 2 Indik Prajuru / Dulun Desa.....	5
Palet 3 Indik Kulkul	6
Palet 4 Indik Paruman	7
Palet 5 Indik Druwen Desa	8
Palet 6 Sukerta Pamitegep	9
Kaping 1 Karang, tegal lan carik ...	9
Kaping 2 Pepayonan	10
Kaping 3 Wewangunan	11
Kaping 4 Wewalungan	11
Kaping 5 Bhaya	12
Kaping 6 Panyanggran Banjar	13
CATHURTAS SARGAH SUKERTA TATA AGAMA	
Palet 1 Indik Dewa Yadnya	13
Palet 2 Indik Resi Yadnya	16
Palet 3 Indik Pitra Yadnya	17
Palet 4 Indik Manusa Yadnya	21
Palet 5 Indik Bhuta Yadnya	21
PANCAMA SARGAH SUKERTA TATA PAWONGAN	
Palet 1 Indik Pawiwahan	22
Palet 2 Indik Nyapian	24
Palet 3 Indik Sentana	25
Palet 4 Indik Warisan	27
SAT SARGAH WICARA LAN PAMIDANDA	
Palet 1 Indik Wicara	29
Palet 2 Indik Pamidanda	30
SAPTAMA SARGAH NGUWAH-NGUWUHIN AWIG - AWIG	31
ASTAMA SARGAH S A M A P T A	32

MURDHA CITTA

AUM, OM

Om Swastyastu, Om Awighnamastu Nama Siddhem,

Malarapan panghyangning Ida Sang Hyang Widhi Wasa, asung kerta nugraha ngawentenang kahuripan sakala niskala, ring Bhuwana Agung lan Bhuwana Alit. Manut dresta desane wantah pawakan pasayuban Krama Desa rawuhing kula warga pawonganya. Desane kamanggehang Bhuwana Agung, pawonganya sowang-sowang pinaka Bhuwana Alit.

Sotanin Bhuwana Agung desane wantah pawakan Bhawa maurip, jangkep saha Tri Hita Karananya, luwire :

- ha. Parhyangan, sehananing kahyangan, panyiwian desa genah ngarcana Ida Hyang Parama wisesa, maka Jiwan desane.
- na. Pawongan, krama saha warga desa maka sami pawakan Bayu Pramana (Tri Kaya) mawinan desane sida molah maprawerti.
- ca. Palemahan, tanah kakuwuban desa, sinanggeh stula sariraning desane.

Adung patemon bhuwana kalih, larapan santa jagadhita, sinanggeh murdhaning prayojana pangriptaning Awig-awig Desa Pakraman ring sabha krama desa adat Nagi.

Pamutus sabha inucap pinaka sepat siku-siku pamatut , wastu prasida prayojanan mami kabeh prasama anghidep muwah ameghaken kadi linging Awig-awig iki.

PRATHAMA SARGAH

ARAN LAN WAWIDANGAN DESA

Pawos 1

- (1) Desa Adat Puniki mawasta Desa Adat Nagi.
- (2) Jebar kakuwub wawidangannya mawates nyatur :
 - ha. Sisih Wetan ring Tukad Petanu;
 - na. Sisih Kulon ring Subak Petulu Andong;
 - ca. Sisih Lor ring Subak Lanyahan;
 - ra. Sisih Kidul ring Subak Sekembang;
- (3) Desa puniki kawangun antuk karang ayahan Desa lan karang gunakaya wantah Banjar asiki.

DWITYA SARGAH.....

DWITYA SARGAH
PATITIS LAN PAMIKUKUH

Pawos 2

Desa Adat Nagi ngamanggehang pamikukuh minakadi :

- ha. P a n c a s i l a ;
- na. Undang-undang Dasar 1945 pamekas Pasal 18;
- ca. Perda Propinsi Daerah Tingkat I Bali No. 06 Tahun 1986;
- ra. Tri Hita Karana manut seda cara Agama Hindu.

Pawos 3

Luwir Patitis Desa Adat Nagi:

- ha. ngukuhang miwah ngrajegang Sang Hyang Agama;
- na. nginggilang tata Prawertine maagama;
- ca. ngrajegang kasukerten Desa saha Pawongannya eskala lawan niskala.

TRITYA SARGAH
SUKERTA TATA PAKRAMAN

Palet 1

Indik Krama

Pawos 4

- (1) Sane kabawos Krama Desa inggih punika kulawarga sane maagama Hindu saha ngamong karang utawi jenek mapaumahan ring sawidangan desa.
- (2) Sajaba punika sinanggeh tamiyu, sane kabinayang dados kalih inggih punika sane maagama Hindu, miwah siwoan ring maagama Hindu.
- (3) Indik Tamiyu punika manut pararem.

Pawos 5

Krama Desa wenten 5 (limang) pawos, luwire :

ha. krama ngarep, kula warga sane ngamong karang, utawi manut pararem;

na. krama.....

- na. krama pengempian apisan kulawarga sane nenten ngamong karang nanging sampun mawiwaha;
- ca. Krama Pengempian ping kalih kulawarga sane nenten ngamong karang ayahan;
- ra. krama balu, krama sane katinggal seda olih lanang utawi istri nyane, utawi sangkaning nyapihan krama balu inucep kabinayang dados :
 1. Balu makrambian, inggih punika balu sane maduwe sentana dereng marabian utawi dereng antes ngayah.
 2. Balu ngalisting, inggih punika balu sane tanpa sentana.
- ka. krama-tapukan, kulawarga manut aksara ha utawi na ring ajeng sakewanten durung antes ngayah utawi salami kentun masekolah malarapan ilikita pastika saking sekolahnya, manut pararem.

Pawos 6

Ngawit dados Krama Desa :

- ha. Sangkaning ngamong karang, jenek mapaumahan utawi manut pararem;
- na. mawiwit pawiwahan;
- ca. Malarapan antuk jumenek, sangkaning mapaumahan sajeroning palemahan Desa Adat Nagi.

Pawos 7

Panamaya tedun makrama Desa:

- ha. Malarapan antuk pawiwahan ngawit rikala ngembak geni;
- na. Malarapan antuk ngarereh pangupa jiwa tur jumenek mapaumahan ring Desa Adat Nagi, sajeroning enem saasih;
- ca. Krama desa tiyosan nunas tedun makrama desa saha ilikita pastika risampun atur supeksa ring prajuru dinas lan adat tur kakenin batu-batu manut pararem.

Pawos 8

Sahanan Krama Desa keni tategenan (ayah-ayahan) luwire :

- ha. ayah marep, mapiteges urunan miwah ayahan mamungkul;
- na. Krama pengempian apisan keni ayahan miwah urunan mamungkul;
- ca. Krama pengempian ping kalih miwah selantur ipun keni ayahan mamungkul urunan satengah ring ayah marep;
- ra. Krama balu, urunan mamungkul ayahnya manut kahanan balu inucap;
- ka. ayah tapukan, keni urunan mamungkul ayah katapuk.
- da. prade rikalaning ngayah wenten sinalih tunggil Krama matilar tanpa sadok sadereng puput karya, wenang Krama inucap keni pamidanda manut pararem, tanjek laler kawastanin.

Pawos 9

Swadharman Krama, sewosan ring tategenan, luwire :

- ha. Tinut saturut ring sadaging Awig-awig, pararem lan paswasran Desa;
- na. Tan maren ngutsahayang mangda Desane mrasidhayang nyujur manut patitis;
- ca. Tinut saturut ring Guru Wisesa.

Pawos 10

Swadharman Tamiyu, luwire :

- ha. Tinut saturut ring yasa kertin Desane;
- na. Tan piwal ring sadaging Awig-awig, pararem lan paswaran Desa;
- ca. Nyadokang raga ring Prajuru arahina sasampun jumenek malarapan antuk ilikita pastika saking desane utawi sang ngawawenang;
- ra. Yan tan tinut pacang kairid (tan kadadosang jumenek ring Desa).

Pawos 11

Pilih-olihan Krama :

- ha. Polih pasayuban sakala niskala tur kabawosin saha katiwakin pamutus sahanan wicaranya;
- na. Nyarengin parumen tur wenang sareng mastikayang pamutus;
- ca. Kadadosang madeg Prajuru, manut pararem.

Pawos 12

Krama Desa Adat kadadosang :

- ha. mapoangkid utawi tan tedun :
 - 1) rikala mapawangun ngeraabin, mayadnya, nandur (mamilih) matepetin rare, sungkan kaluasan, lan siosan punika;
 - 2) kengin tempo wantah apisan, sajawanin wenten wak-wakan saking Prajuru Desa.
- na. nyada, mapiteges ngamademang ayah, risampun mayusa 75 warsa, tur tan dados nyuksukin, sang nyada mangda digelis (sajeronin a warsa) mangda nyantenang panyaladihi;
- ca. nyade, utawi nyuksukin, sane kawenangang risampun manggeh deha-teruna utawi mrasidayang nganutin krama;
- ra. nutug ayah antuk arta brana saantukan kapialang utawi ngentos ayah-ayah antuk arta brana manut paetangan soang-soang tempek, manawi kajudi olih sang mawangrat, utawi kaluasan salami 3 - 7 rahina.

Pawos 13

Wusan dados Krama Desa, luwire :

- ha. Sangkaning :
 - 1) Pinunas ngaraga, manawi kesah kadura Desa utawi ngalangkungin sagara;
 - 2) Kanorayang , duaning sampun tan prasida ngesehin solah maprawerti satata nguwug pamargin Awig-awig.
 - 3) Wusan makrama desa mapiteges taler wusan makrama banjar utawi wusan makrama banjar mapiteges wusan makrama desa, mangda sampunang kasinanggeh empak ngelanting.

na. Sang

na. Sang wusan makrama :

- 1) Patut ngaturang karang ayahan ka Desa, prade karang punika karang Desa;
- 2) Tan polih pah-pahan saking padruweyan Desa sajawaning pah-pahan padruwen ring tempek manut pararem.
- 3) Tan polih pasayuban sajroning ala ayu.
- 4) Sang wusan makrama desa/Banjar prade mawali malih patut nawur saurah arih tategenan krama manut pararem.

ca. Sang wusan sangkanin kenorayang, prade mawali malih patut:

- 1) muntasang saluwir pamidanda utawi tategenan sane ngranayang kenorayang;
- 2) nunas geng pangampura ring paruman desa maduluren panyangaskara panyapeap kaiwangan duwening nguwak pasubaya pecak.

Palet 2

Prajuru lan Dulun Desa (Panglingsir)

Pawos 14

- (1) Desa Adat Nagi kaenter olih Bendesa Adat.
- (2) Banjar utawi tempekan kaenter olih Klian Banjar/Tempek.
- (3) Bendesa lan Klian Banjar patut :

ha. mawiwit saking krama ngarep/wed kajangkepin antuk:

- 1) Uning ring aksara latin utawi Bali;
- 2) Uning ring tata titining mawa desa;
- 3) Uning ring periindik Agama lan Adat;
- 4) Lascarya ngayah tur madruwe parilaksana sane rahayu.
- 5) Tan Cedangga.

na. kaadegang malarapan antuk kacatri olih parumannya soang-soang nyabran 5 (limang) warsa, sajawaning wenten pariindik tios, tur dados kacatri malih;

ca. maduluran Dewa saksi ring Pura Bale Agung.

Pawos 15

- (1) Bendesa Adat kasanggra olih :
 - ha. Patajuh utawi Panglimen pinaka wakilnya;
 - na. Panyarikan pinaka juru surat;
 - ca. Patengen utawi juru raksa pinaka pangamong druwen Desa;
 - ra. Kasinoman pinaka juru arah.
- (2) Kasinoman akehnya manut kawigunan saha magilir nyabran ngasasih.
- (3) Sajeroning ngenterang kasukertan niekala, Bendesa mingsinghihang Pamangku Kahyangan Desa utawi sang Rumaga Sulinggih.

Pawos 16

(1) Swadharmaning Bendesa Adat luwire :

- ha. ngenterang pamargin sadaging Awig-awig miwah pararem Desa;
- na. nuntun tur ngenterang krama rawuhing warga Desa sami ngupadi manut patitis;
- ca. mawosin kalih niwakang pamutus arep ring wicara warga Desa;
- ra. maka dutta Desa matemuang bawos ring sapa sira ugi.

(2) Prade Prajuru iwang palaksana keni pamidanda nikel ring kaiwangan soang-soang krama, tur dados kareryanang manut pararem.

Pawos 17

Patias utawi olih-olihan Prajuru/Dulun Desa, luwire :

- ha. luput papeson manut pararem;
- na. polih tanding tengah;
- ca. upon pacatu/palaba carik manut pararem;
- ra. patias sewosan manut pararem.

Pawos 18

(1) Prajuru / Dulun Desa kagentosin riantukan :

- ha. s e d a;
- na. kanorayang dwaning iwang pamargi utawi nilar sesana;
- ca. wit saking pakayun utawi pinunas ngaraga.

(2) Nganorayang utawi ngentosin Prajuru/Dulu-dulu patut sajeroning paruman tur kaingkupin olih Krama Desa.

Palet 3

Indik Kulkul

Pawos 19

(1) Kulkul ring Desa luwire :

- ha. Kulkul Desa;
- na. Kulkul Banjar;
- ca. Kulkul Sekaa-sekaa.

2) Tabuh tatepakan kulkul Desa :

- ha. duang tulud lambat tengeran tedun makarya;
- na. atulud bulus, tengeran tengeran kageni baya;
- ca. duang tulud bulus, tengeran kapandangan;
- ra. Tigang klentungan ngempangtengeran ngawangdeang makarya;
- ka. Nungtit, maka cihna tedun mendak miwah nyineb ida batara surya greha miwah bulan kapangan;
- da. nungtit bulus tengeran lindu baya, er baya, pawana baya.

(3) Tabuh tatepakan kulkul banjar :

- ha. tigang klintungan lambat tengeran kalayu sekaran;
- na. limang klintungan lambat tengeran pawiwahan;
- ca. Pitung klintungan lambat tengeran ngembas putra.

Pawos 20

- (1) Kulkul Desa utawi Banjar, tan wenang katepak yening tan sangkaning pituduh Prajuru Desa / Banjar sajawaning tengeran bhaya.
- (2) Sang nepak tan sangkaning pituduh patut digelis atur supekea maka buatan panepake, yan tan sapunika wenang sang mawurug kadanda manut pararem.
- (3) Kulkul sekaa-sekaa samaliha kulkul pondokan-pondokan tan kalugra nyawerin (matchin), sukat utawi tengeran kulkul Desa / Banjar, prade mamurug taler kadanda manut pararem.

Palet 4

Indik Paruman

Pawos 21

(1) Paruman/sangkepan ring Desa Adat Nagi, wenten :

- ha. paruman Desa/Banjar, kawentenang :
 - 1) nyabran ngessih, maka cihna tanpa arah-arah, dwaning sampun tetep panamaya manut pararem;
 - 2) napkala (pedgata kala) maka jalaran arah-arah manut tatujon.

na. Paruman Prajuru/ dulun desa, kawentenang manut wiguna;

ca. paruman sekaa-sekaa manut pabuat.

(2) Paruman Desa utawi Banjar madudonan sekadi ring sor :

ha. prasida lumaksana risampun katedunin olih sang patut ngamiletin, kamanggala antuk tengeran kulkul miwah mabusana Adat madya, saha tan kalugra makta gegawan sakaluwire, tan maren ngarcana ring Ida Bhagawan Panyarikan maka sarana Widhi Widana cane;

na. maka sarana janggi, pangawit kalaksanayang panyacak sep-sepan saha riwusannya nyacak, ngetang dadosan gung alit manut pararem;

ca. tan kalugra ngawetuang suwara gora utawi byota, yang wenten asapunika keni pamidanda beya pacamil kadi dandaning nguman-uman ring sabha;

ra. pamutus babawos beriuk sapanggul (ingkup) punika kamanggehang.

(3) Prade.....

- (3) Prade pidaging paruman tan kaingkupin mangda Prajuru/Dulun Desa ngilikang babawos, saha pamutusna mangda kararemin olih Krama Desa, bilih tan prasida kasungkem jantos ping tiga Prajuru/Dulu wenang nunes bawos ring Seng Ngawa Wenang.

Pawos 22

- (1) Sajeroning paruman Desa, Bendesa patut nyobyahang pamargin ngenterang Desa, pamekas nganinin indik:
- ha. munjuk lungsuring pakraman saha ayah-ayah, sulur arta berana, druwen Desa;
 - na. Rarincikan Prajuru / Dulu nganinin usaha Desa kapungkur.
- (2) Pamutus paruman Desa sinanggeh pararem maka pamitegep daging Awig-awig.

Pawos 23

- (1) Paruman Prajuru/Dulun Desa kawenangang wantah ngarincikang pangerencana usaha Desa kapungkur.
- (2) Paruman Prajuru /Dulun Desa tan kawenang ngawedalang tategenan ring Krama sadereng kaingkupin olih Krama Desa ring paruman.
- (3) Pamutus sangkepan prajuru/Dulun Desa ngawetuang pasuwara, maka pidaging pituduh sang Ngawawenang utawi ngonekang pecak pararem krama desa.

Palet 5

Indik Druwen Desa

Pawos 24

Padruwen Desa Adat Nagi sakadi ring sor :

- ha. Kahyangan Desa luwire :
 - 1) Kahyangan Tiga ;
 - 2) Pura Catur Bhuana (ulun Desa);
 - 3) Pura Pura Doho;
 - 4) Pura Dalem Alit;
 - 5) Pura Bukit Sari;
 - 6) Pura Prajapati.
- na. Bale Banjar;
- ca. Tanah tegalan malinggah (manut ilikita);
- ra. Tanah Carik malinggah (manut ilikita);
- ka. Karang ayahan Desa;
- da. Setra-setra palebahan, makadi :
 - 1) Setra-setra pangarep;
 - 2) Setra-setra rare.

ta. Palaba.....

- ta. Palaba Pura, carik/tegal (manut ilikita)
sa. Lelanguan, makadi tetabuhan lan ilen-ilen padruwen Desa/
bebanjaran luwire :
1) Angklung;
2) G o n g;
3) Ilen-ilen wali Pura : Rejang, Pendet, lan sapanunggilanipun;
4) Muwah padruwean tiyosan.

Pawos 25

Piolih-olihan Desa Adat Nagi luwire :

- ha. piolih-olihan saking palaba Pura;
na. urunan Krama Desa Adat;
ca. paica saking Guru Wisesa;
ra. Paica-paica sane tiyosan, sane patut;
ka. usaha Desa Adat.

Pawos 26

- (1) Prajuru / Dulun Desa wenang ngetangang pamupon laba Pura lan sapanunggalan druwen Desa.
- (2) Pikolih lan pamuponnya kaanggen prabeya piodalan saha wewangunan ring Pura miwah anggen kabuatan Desa Adat.
- (3) Nyabran pasangkepan Desa, Prajuru /Dulu pangamong druwe dees nguningayang pariindik munjuk lungseuring padruwean ring Krama Desa.
- (4) Sakaluwiring druwen Desa patut wenten ilikitannya.
- (5) Tan kalugra ngadol utawi ngesahang padruweyan Desa yan tan kasungkemin olih Krama Desa ring paruman.

Palet 6

Sukertan Pamitegep

Kaping 1

Karang, Tegal lan Carik

Pawos 27

- (1) Krama Desa pangamong Karang Desa utawi karang gunakaya patut ngawatesin karang inucap antuk tembok utawi pagehan mangda pakantenannnya asri.
- (2) Wates sisi kaler miwah kangin patut kakaryanin olih sang ngamong karang ayahan inucap, sane mawasta gegaleng kaluan, sajawaning tanah pacatu, tegal, carik utawi tanah padruweyan ngaraga, sane kapiara wates sisi klod miwah kauh utawi manut drestha reh punika mawasta gegaleng kateben.

- (3) Prade karassyang pagehan/turus inucape ngalikadin, yen pada area panyandinge, kengin watese nganggen pinget kewanten, kasaksinin olih Prajuru/Dulun Desa utawi pracihna pal saking Sang Ngawawenang.
- (4) prade wenten karang kabebeng /embet mangda kautsahayang wenten pamarginnya,manut paigum lan pararem.
- (5) Tan Kengin :
 - ha. ngentungang luhu, wangken wewalungan kapakarangan/tegal anak lian, kalih kamargine utawi katukade;
 - na. ngembahang toya wit saking badan wewalungan, kekus, pasiraman, pawaregan miwah sane sewosan kategal, carik, kamargine utawi katukade sane ngawinang ambu kawon;
 - ca. Prade wenten sakadi ring ajeng keni pamidanda manut pararem.

Pawos 28

- (1) Sinalih tunggil Krama Desa/Banjar tan kalugra :
 - ha. Ngalah-alah margi, tegal syahan Desa, karang Desa, lan sapanunggalanya;
 - na. ngalah-alah tanah linggih kahyangan, tegak setra, lan sakancan linggih sinanggeh suci.
- (2) Prade wenten sakadi ring ajeng ,sang ngalahlah wenang ngawaliang tanah inucape saha keni pamidanda manut pararem kadulurin upakara prade ngalahlah tanah suci.

Kaping 2

P e p a y o n a n

Pawos 29

- (1) Ngawit nandur pepayonan tanem tuwuh patut adepa agung (1,5 meter) ngajeroang saking wates,prade jantos ngaliwat wates wenang kasepat gantungan.
- (2) Yening wenten tatanduran ngungkulin,samaliha mawastu mayanin kapiaga patut kawara antuk paiguman ping ajeng mangda prasida sang nruwenang wit ngarebah utawi notor .
- (3) Prade sampun kawara taler tan wenten utssha sang nruwenang wit,sang rumasa katetehan/kajerihan wenang masadok ring prajuru/Dulu,tur risampun kaparitatas kalugra mademang wit inucape,sakewanten patin pepayonan patut katawur manut pangeloika sane nepasin.
- (4) Sang keni pamidanda panyangaskara saha prabeaya manut pararem arep ring wewangunan sang karubuhin,luwire;
 - ha. Sang nruwenang wit sinanggeh mayanin,prade punkat ngarubuhin wewangunan krama tiyos;
 - na. Sang notor,munggul utawi ngarebah taru tur ngarubuhin krama tiyos.

- (5) Prade wenten wit mentik sajronin wates patut kapademang, mangda tan ngranayang wicara. Prade sampun ageng kapademang, wit punika pinara tiga :
 - ha. Apah tiga katur ring sang nruwenang wit.
 - na. Apah tiga katur ring sang penyandingnya.
 - ca. Apah tiga katur ring Desa Adat.
- (6) Krama Desa patut ngamanggehang kawerdian tanem tuwuh sane ngawinang Desane asri.

Kaping 3

Wewangunan

Pawos 30

- (1) Nyabran ngawangun patut :
 - ha. masadok ring Prajuru / Dulu, ping ajeng prade wewangunan nganinin wates;
 - na. ngangge eukat asta bhumi miwah gagulak asta kosala - kosali, sanistane manut ring patitis niskala;
 - ca. tan nyayubin kapiaga.
- (2) Prade wewangunan jantos nyayubin bilih-bilih temboke ring telengin wates, risampun kawara tur kasadokang ring Prajuru/Dulu, wenang kadanda manut pararem saha tembok inucap kagubar utawi sanistane mangda kakaryanang abangan.

Kaping 4

Wewalungan

Pawos 31

- (1) Warga Desa sane mamiara wewalungan patut sayaga nitenin negul/ngalogor mangda tan ngarusak kerang utawi pabianan Krama sewos, bilih-bilih jantos ngaranjing ngaletihin Kahyangan.
- (2) Prade wenten wewalungan malubar utawi ngeleb ngarusak pakarangan/pabianan Krama sewos, risampun kawara dados kataban tur kadanda ngawaliang wit sane karusak saha nawur panebas papiaran tetabenan, manut pangeloikan Prajuru/Dulun Desa.
- (3) Prade jantos ngaletihin linggih suci, minakadi Pamrajan, risampun kaparitatas olih Prajuru/Dulu wenang sang nruwenang kadanda mabuhu agung (caru eka asta, maduluran tebasan prayascita durmanggala), prade ngaletihin Kahyangan Desa utawi Pura Pamaksan, wenang nyaronin antuk Panca asta makerep itik belang kalung.
- (4) Krama desa patut nyanggra wewalungan miwah sarwa prani, tan kapatutang ngamademang paksi, nuba ulam, miwah sane sewosan. Prade wenten malaksana sakadi punika keni pamidanda manut pararem tur kaaturang ring sang Ngawawenang.

Kaping 5

B h a y a

Pawos 32

- (1) Pariindik bhaya, luwire : jiwa bhaya, artha bhaya (kapandangan), dura cara ring Agama.
- (2) Sang manggihin kahanan jiwa bhaya, patut nepak kulkul bulus mapitulung manut pawos 19 (3) aksara ha.
- (3) Prade ring Desa kahanan jiwa bhaya, patut Desane ngaturang Bhuta Yadnya, tur sang mayanin kaaturang ring Sang Ngawawenang.
- (4) Prade wenten jatma mamisuh utawi nguman-uman jadma tiyos, kakenanin pamidanda beya pacamil maduluran tebasan prayascitta.

Pawos 33

- (1) Sang manggihin kahanan artha bhaya (kamalingan), patut ngulkul mapitulung manut ring pawos 19 aksara ca utawi sang kamalingan atur supeksa ring Prajuru / Dulun Desa sane pacang nimbangin utawi nandanin manut pararem, saha maweweh penyangaskara prade wenten jatma ngamaling barang sinanggih suci sang malaksana kaaturang ring sang ngawawenang.
- (2) Pratingkahe mapailon ring dusta kabawos saruron, prade wenten jatma manggihin maling tan nyadokang ring Prajuru/ Dulu jantos jatma tios nyadueng, patut kadanda kadi dandaning maling, sakweh pangargan wit manut cacakan Banjar, tur prade jantos ping tiga malaksana asapunika wenang kasukserah ring sang Ngawawenang.
- (3) Prade wenten jadma ngarereh reramon, minakadi daun kelapa, ron miwah sane sewosan tanpa sadok ring sang nruwenang wit, prade kacunduk (katara) patut kadanda kadi dandaning maling.
- (4) Yening wenten jatma ngaranjing kapakubon wiadin pekarangan jatma tiyos rikala suwung, mawastu sang madruwe karang kaicalan, wenang jatma inucap katuwekang antuk madewa saksi ring Pura Bale Agung.
- (5) Mangda tan katuwekang manut sakadi ring ajeng, asing-asing ngeranjing kapakubon jatma tiyos patut :
 - ha. matengeran suwara (makaukan);
 - na. nyantos sang nruwenang karang rawuh utawi masadok ring pangapit pinih tampek, maka buatan pangaranjinge;
 - ca. pamedal karangnya kadagingin sewen, maka cihna pangarah rikala suwung.

Kaping 6
Panyanggran Banjar
Pawos 34

Krama Desa rikala ngawentenang karya suka-duka, patut kasanggra olih Banjar, luwire :

- ha. Prade ngawangun Pitra Yadnya utawi Manusa Yadnya, manut pinunas sang mayadnya;
- na. Pangarombo utawi karya gotong-royong krama jantos ping tiga, langkungan ring punika patut katuran pangingu;
- ca. Pangingu rikala Pitra Yadnya manut abot dangan Yadnya, prade saking semengan ngantos wengi katuran pangingu ping kalih.
- ra. Pangarombo tiyosan manut pararem.

CATHURTIAS SARGAH
SUKERTA TATA AGAMA

Palet 1
Indik Dewa Yadnya
Pawos 35

Kahyangan miwah piodalan/rerahinan.

ha. Kahyangan Panyiwian ring sawidangan Desa Adat Nagi luwire:

- I. Pura Kahyangan Tiga luwire : Pura Desa/Bale Agung, Puseh miwah pura Dalem lan Prajapati;
- II Pura Doho, Pura Ulun Gumi/Desa, Pura Bukit Sari;

na. Rahina Piodalan ring soang-soang kahyangan inucap sakadi ring sor;

- 1. Pura Desa/Puseh ; Anggara Kliwon Wuku Tambir;
- 2. Pura Dalem lan Prajapati ; Anggara Kasih Prangbakat;
- 3. Pura Doho ; Saniscara Kliwon wuku Kuningan;
- 4. Pura Ulun Gumi ; Euda Wage Wuku Ukir;
- 5. Pura Bukit Sari ; Anggara Kasih Prangbakat;

Sewosan ring aci piodalan/rerahinan kadi arep ring Desa Adat Nagi satunggil atukuan (masorohan);

ca. Wus punika kawentenang aci buta yadnya marupa caru panca sata rikalaning pangrupukan sadina sadurung rahina rahina panyepian jagat;

Pawos.....

Panyiwi Pura

- ha. Warga Desa Adat Nagi sane ngangge setra miwah pura dalam ring Desa Adat Nagi wenang nyiwi pura sawidangan Desa Adat Nagi manut takeh turun miwah pararem;
- na. Indik Genah nyiwi/nyungeung pura Desa Desa Adat Nagi kapidadab ring sukerta tata pakraman;
- ca. Ritatkala aci miwah pasangkepan ring pura Desa Adat Nagi sane ngamiletin patut nganggen busana adat Madya;
- ra. Satunggil aci ring pura kayangan patut karawuhin olih krama panyiwi lanang miwah istri lan kula wargan nyane.

Pawos 37

Indik ngadegang pamangku:

- ha. Ring soang-soang Pura inucap patut kaadegang Pamangku;
- na. Ngadegang Pamangku manut tata cara/dudonan kadi ring sor:
 - Nyanja, mapinunas ring niskala.
- ca. Pamikukuh dados pamangku wenang :
 - Sang kapituduh tan wenang tulak, sajaba wenten larapan sane katrima olih prajuru.
- ra. Tan wenang anggen pamangku luwire :
 - 1) Cedangga makadi, peceng, Perot, Cungih, Kate, ngidulin miwah cuntaka siyosan ring raga;
 - 2) Sang sapa sira ugi sane tan kapatutang manut pararem;
 - 3) Kageringan makadi sakit ila, ayan miwah buduh/edan;
 - 4) Sane tan madrebe kasucian urip.
- ka. Prabia kapamangkuan :
 - 1. Adikea Widhi (ngawintenin) lanang istri kamedalin saha kalaksanayang olih sang ngadegang, makadi krama Desa utawi pangempon Pura soang-soang;
 - 2. Mapitra Yadnya riwekas lanang miwah istri patut kasungkemin olih Krama Desa utawi pangemong, sanistane Brahmaprayasita, panyanggrane manut pararem prade Yadnya inucap kalaksanayang olih wargan sira pamangku.
 - 3. Sinalih tunggil krama yan wenten ngipik-ipik sapari polah pamangku, nanging pamangku tan sepunika pari polahnya kadi eane kaipik-ipik, wenang jadma inucap kasisipang nyuciang pamangku, manut pararem.
- da. Pamangku patut ngamanggehang saenaning Pamangku luwire :
 - 1. Ambek Dharma sadhu;
 - 2. Asewaka Dharma, makadang sastra utama;
 - 3. Tan parek ring naya dustha;
 - 4. Tan atayub ring tarub camara yudha;
 - 5. Tan manjing ring umah wong baniija karma;
 - 6. Tan manjing ring umah wong drati krama;

7. Tan wenang sajuden;
 8. Tan anginum asing angawe mada;
 9. Tan pati pikul-pikulan;
 10. Tan salah suluh;
 11. Tan wenang anayub upadrawaning cor, yan mawiyawahara teka wenang adewa sakesi;
 12. Tan griganing wong akweh;
 13. Tan keneng cuntakaning wong len, sajawanin kulawarganya tunggil natah, utawi pasiwanya manut dresta.
- ta. Prade mamurug, wenang Pamangku nyepuhin raga kasaksinin olih Prajuru Desa.
- sa. Yan pacang ngawalat rabi wenang ngaturang rumuhun pawintenanya, ring pura genahnya madeg pamangku nguni, tembenya wawu wenang ngawalet rabi, riwus upacaranya wenang ngawana wasa salaminya atahun, wus punika wawu mawinten lakibi kadi pawintenanya nguni.

Pawos 38

Swadharman Pamangku luwire :

- ha. Ngenterang upacara piodalan ring Kahyangan utawi ring soang-soang pakubon krama;
- na. Nitenin/matitis kasucian kayangan;
- ca. ngaturang panawuran-panawuran sinalih tunggil krama desa adat;
- ra. Miera pralingga miwah pengangge ring pura soang-soang;
- ka. Nyadokang ring prajuru yan prade wenten pralingga miwah pengangge pura sane rusak/tur prajuru patut ngentosin manut pangeloika;
- da. Samalih tan pamangku kapialang utawi Cuntaka, kengin nguntab pamangku kayangan tiga tiyosan;

Pawos 39

Pioli muang patuwas Pamangku luwire :

- ha. Luput ayah muang papesoan ring pura;
- na. Polih pamupon bukti/labe pura manut pararem;
- ca. Polih sarin canang manut pararem;
- ra. Patiyas tiyosan manut pararem.

Pawos 40

(1) Pamangku kagentosin riantukan :

- ha. S e d a ;
- na. Pinunas ngaraga, sangkanin kegeringan lan sapanunggalannya;
- ca. Kauwusang olih krama desa riantukan nilar sesana kapamangkuan;
- ra. Prade molih ngalap rabi strilarangan patut kauwusang olih krama desa.

Pawos 41

Kasukertan Kahyangan kadi ring sor :

ha. Tan kalugra ngaranjing kepura luwire :

1) Sang.....

- 1) Sang kacuntaka wiadin sebel;
- 2) Makta sakancan barang sane kasinanggeh ngaletihin;
- 3) Sato agung (wewalungan) sajawaning rikala mapapada;
- 4) Mabusana sane tan manut kadi tatacaraning ngaranjing kapura;

na. Pratilaksana sane tan wenang ring Pura :

- 1) Masumpah, utawi cor sajawaning kalugra olih Prajuru Desa Adat;
- 2) Makobetan, masasenengan, makolem dados asiki lanang wadon, mabacin, mawyawahara, macecepin rare, majaljal, majengilan nyangsang busana;
- 3) Munggah tedun palinggih sajawaning pituduh pamangku wiadin Prajuru.
- 4) Ngamargiang tirta sajawaning pituduh pamangku;
- 5) Mabawos sane nenten becik, miwah sane liyanan.

ca. Sang mamurug kecap ring ajeng keni pamidanda pamrayascitta sapatutnya.

ra. Yan wenten jatma karawuhan ring pura, kengin kapintonin, prade rumasa kasangsayan yan tan wiakti jatma inucap kasisipang manut pararem.

Pawos 42

Kadurmanggalan miwah prabeya mecikang kahyangan :

- ha. Prade Kahyangan kahanan durmanggala, minakadi keni bhaya Pamangku/Sang manggihin, patut digelis nyadokang ring Prajuru mangda marumang krama Desa tur ngawentenang pamrayascitta sapatutnyane.
- na. Mecikang kahyangan sane rusak patut kasungkemin olih krama desa manut pamutus/paruman.

Palet 2

Indik Resi Yadnya

Pawos 43

- (1) Sang pacang madeg Pandita utawi Pinandita minakadi Balian Sonteng, Kubayan, Dalang, sakaluwiring sane Jagi ngenterang Yadnya patut masadok ring Prajuru Desa utawi Parisada Hindu Dharma Indonesia.
- (2) Prajuru Desa patut ngawas nitenin tur wenang ngalangin prade wenten kacihnan nyasarring kakecap miwah drestane, tur sareng nyaksinin upacaranya saha nyobyahang ring paruman Desa tegap rawuhing wates kawenangannya ngenterang yadnya.
- (3) Krama Desa patut ngaturang ayah sapamadeg miwah ring pangelepas Sang Sulinggih riwekas katuntun olih Prajuru/Dulu Desa.

Pawos 44

- (1) Sang Sulinggih lan pamangku patut ngariyining muputang ring wawidangan Desa Adat Nagi, sasampun punika wawu muputang yadnya kajebar tiis Desa utawi kadura Desa.
- (2) krama desa sami patut sareng ngawas nitenin katuntun olih Prajuru/Dulu-dulu, mangda sahanan yadnya sane kawentenang kaicen pamuput olih Padanda utawi Pinandita manut kawenanganya soang-soang.

Palet 3

Indik Pitra Yadnya

Pawos 45

Pamargin Pitra Yadnya :

- ha. Pangupakaran Sang kalayu sekaran : antuk mendem utawi makingsan ring geni, salami nuptupang prabiya;
- na. Atiwa-tiwa utawi ngaben manut sastra agama miwah dresta sane sampun kamargiang;
- ca. Anak alit sane wawu emabas, sadurung ketus untu dereng katiwakin pangabenen, nanging kamargiang upacara pangalungah;
- ra. Upacara pitra yadnya selanturnya marupa upakara nyekah utawi ngaroras, wus punika sang mrasidayang dados ngalinggihang Dewa Hyang utawi nuntun.

Pawos 46

- Swadharman miwah tategenan sang madruwe kalayusekaran :
- ha. sang kasungkawan wenang masadok ring Klian Desa Adat nunas tatimbang, pamargi padewasaan upacara pitra yadnya;
 - na. prajuru desa adat patut nikenin tur maritetes pamargin sang kalayu sekaran, patut kalugra ngabenutawi mndem;
 - ca. pamargin sawa ritatkala kasetra patut karuntutin antuk wirama kekawin;
 - ra. krama desa adat tan kadadosang ngamargiang pitra yadnya/ngaben wiadin mendem ritatkala bambang apit setra, lutung magelut, semut sadukur kala gotongan, was panganten, purwani, purnama tilem miwah rahina larangan/kekeran desa;
 - ka. sadurung karya panca wali krama ring Pura Besakih (10) warsa apisan krama Desa Adat Nagi patut kamargiangupacara pitra yadnya sawusan swasta geni utawi ngerit.

Pawos 47

- Indik genah mendem sawa ring setra :
- ha. mendem sawa ring genah setra rare;
 - na. sewosan kadi ring ajeng yan sampun ketus untu kantos yusa lingsir patut kapedem ring setra agung.

Pawos 48

Indik salah pati ngulah pati :

- ha. Yan prade wenten lampus salah pati, pati kapangswan mati kabebeng miwah sakan-sakan ipun kengin bakta budal tur keprateka, upacara kategepin antuk upacara panebusan miwah pangulapan;
- na. Yan lampus sangkaning gering ngalah lalain (sakit ila) manut kadi surat keterangan dokter risampun katureka kadi patut, wenang kapendem ring setra;
- ca. Yaning wenten krama lampus kadi arep sane madrebe sawa punike patut nyadokang ring prajuru desa miwah krama sane ngarep nyiramang sang lampus patut sadurungnya kaicen panyampi olih dokter;
- ra. Prade wenten wong lampus ring pakarangan, tegal, sawah miwah sane sewosan patut sang madrebe sawa maprayascitta genah inucap.

Pawos 49

Kacuntakan :

- ha. Mungwing kacuntakan kadi ring sor :
 - 1) Kulawargan sang seda sane kacuntakan saking wawu lampus kantos upacara masapuh (maprayascita).
 - 2) Yaning layon durung tutug akambuhan suwen kacuntakan 42 (petang kalih) rahina saking mendem.
- na. Tan kengin ngalelet langkungan ring 7 (pitung) rahina, sajawanin pacang kaabenang tur patut polih pagebagan manut paetengan Klian patas / Banjar.
- ca. Tan kalugra nginepeng bangbang miwah mendem rikala:
 - semut sadulur,
 - kala gotongan,
 - Pasah,
 - Kliwon, kajeng Kliwon,
 - Soma, Umanis, Taulu,
 - Was panganten,
 - Ingkel wong,
 - Prawani, Purnama, Tilem,
 - Rerahinan jagat.
- ra. Prade wenten kalayu sekaran rikala piodalan, kengin mendem tanpa sadok, tan nyuwarayang kentongan/kukul tur mamargi wengi/sasiliban utawi ka setra siosan (setra pakingsan).
- ka. Pamargin pamendeman utawi palebonan mangda ngsnutin sastra agama lan dresta.

Pawos 50

(1) Sane kasinanggeh kacuntaka sakadi ring sor :

- ha. cuntaka antuk kalayu sekaran;
- na. cuntaka antuk ngeraja swala;
- ca. cuntaka antuk ngembasang putra;
- ra. cuntaka antuk karuron;
- ka. cuntaka antuk sakit ila, buduh;

da. cuntaka.....

- da. cuntaka antuk pawiwahan;
- ta. cuntaka antuk gamia gamana;
- sa. cuntaka antuk salah timpal;
- wa. cuntaka antuk yening wenten anak istri mobot nenten kaupakarayang pabiukawonan miwah pawidiwidana;
- la. cuntaka antuk mamitra ngalang;
- ma. cuntaka antuk yening wenten anak istri ngamedalang putra sadurunge maupakara pabiukaonan miwah pawidiwidana;
- ga. cuntaka antuk sad Tatayi.

(2) Sengker cuntaka manut kawentenannya:

- ha. cuntaka kalayu sekaran, cuntakanya keanutang ring loka dresta Desa Adat soang-soang;
- na. cuntaka ngraja swala, 3 rahina ngawit saking ngraja swala utawi salaming ngraja swala;
- ca. cuntaka ngembas putra, 42 rahina (abulan pitung rahina) ngawit saking putrane embas, utawi ngantos sampun kaupakarayang makakambuhan lan maperayascita manut sastra Agama, lanang wiadin istri;
- ra. cuntaka karuron, cuntakanya abulan pitung rahina (42 rahina) tur sampun matirta pamerayascita;
- ka. cuntaka sakit ila, buduh/edan, cuntakanya manut ilikita pastika saking Sang Ngawawenang/sang nambanin miwah sampun mrayascita raga;
- da. cuntaka pawiwahan, cuntakanya ngatos sasampune matirta pabiukaonan;
- ta. cuntaka gamia gamana, cuntakanya ngantos sasampune kapalasang/kasapihang tur sampun kawentenang pamrayascita raga miwah pamrayascita Desa Adat/Kahyangan;
- sa. cuntaka salah timpal kapuputang manut ring sastra Agama Hindu;
- wa. cuntaka anak istri mobot nenten kawentenang upakara pabiukaonan, cuntakanya ngantos kawentenang upakara pabiukaonan;
- la. cuntaka mamitra ngalang, cuntakanya ngantos kawentenang upakara pabiukaonan;
- ma. ngembasang putra nenten kawentenang upakara pabiukaonan miwah pawidiwidana, cuntakanya ngatos wenten sane mameras sang putra, lan sampun kawentenang upakara manut ring sastra Agama Hindu;
- ga. cuntaka Sad Tatayi, cuntakanya ngantos sampun maprayascita raga tur nenten pisan dados ngamunggang upacara padwijatian.

(3) Cuntaka kalayu sekaraan/kapademan :

- ha. Kependem cuntakanya :
 - 1) cuntaka/sebel kabanjar ngantos 3 rahina riwusnya mendem/manut dresta utawi sasampun polih pamrayascita.
 - 2) kulawargana sajeroning pakarangan ngantos 42 rahina/manut dresta.
 - 3) pangapit/kulawarga misan mindon 11 rahina.
- na. Kaabenang cuntakanya :

Sang nyambut karya Pitra Yadnya cuntakanya ngawit saking nyambut padewasan karya, wusan mapegat kalanturang malih tigang rahina.

- (4) Sane katiben cuntaka luwire :
- ha. Kalayu sekaran sane kacuntaka :
 - 1) sang sane kalayu sekaran;
 - 2) kulawarganya;
 - 3) babanjaran;
 - na. Ngraja swala sane kacuntaka :
 - Sang sane ngrajaawala.
 - ca. Ngembas putra sane kacuntaka :
 - Kawulawargania sane ngembasang putra lanang wiadin istri.
 - ra. Pawiwahan sane kacuntaka :
 - Sang sane ngalaksanayang pawiwahan lanang wiadin istri.
 - ka. Sakit ila/buduh, sane kacuntaka raganya dawak.
 - da. Karuron sane kacuntaka :
 - Kawula warganya lanang wiadin istri.
 - ta. Gamia gamana sane kacuntaka :
 - 1) Sang sane ngalaksanayang gamia gamana;
 - 2) Desa Adat nyane.
 - sa. Salah timpal sane kacuntaka :
 - 1) sang sane malaksana salah timpal;
 - 2) kulawarganya;
 - 3) Desa Adat/Kahyangan.
 - wa. Anak istri mobot nenten kawntenang upacara pabiukaan sane kacuntaka :
 - Sane maraga istri (sane mobot)
 - la. Mamitra ngalang sane kacuntaka :
 - Sane ngalaksanayang mamitra ngalang.
 - ma. Ngembas putra nenten kawntenang upacara pabiukaan miwah upakara pawidi-widana sane kacuntaka :
 - 1) Sang sane ngembasang putra;
 - 2) Putra sane mbas.
 - ga. Sad Tatayi, sane kacuntaka :
 - Sang malaksana Sad Tatayi.
- (5) Tan keneng cuntaka, luwire :
- 1) Sang eulinggih lan Pemangku Kahyangan tiga;
 - 2) Rikala piodalan risampun ngalang sasih/ngalang tengah.

Pawos 51

- (1) Attiwa-tiwa (pangabenan) kalaksanayang antuk :
- ha. Sawa prateka, pangabenan mawatang sawa;
 - na. Sawa resi, pangabenan mawatang antuk sawa kresyan;
 - ca. Suwasta, pangabenan mawatang sawa sane tan kakeniang, kagentos antuk lalang utawi toya.
- (2) Panamayan pangabenan wenten kalih pawos :
- ha. Ngaben dadakan/bah bangun manut pararem;
 - na. Ngaben ngamasa, manut pararem.
- (3)-Dudonan pangabenan ngawit saking ngagah (seda), ngeseng ngantos pangiriman utawi nganyut.

Pawos 52

- (1) Peputusan pangabenan wenten kalih pawos :
- ha. Ngaben ngamasa luwire : beras, ayam, kelapa, gesing, papah jaka, kelangah miwah sane sewosan manut pararem.

na. ngaben.....

na. Ngaben dadakan, pateh sakadi patus seda kapendem.

- (2) Pangingune ring Krama banjar ngawit ngayah manut abot dangan kawentenan karya.

Palet 4

Indik Manusa Yadnya

Pawos 53

- (1) Manusa Yadnya inggih punika upacara-upakara dharmaning kahuripen manusa, ngawit sakeng patemoning kama bang kalawan kama petak sajeroning garbha ngantos kalayu sekaran riwekas.
- (2) Upacara ring ajeng madudonan sakadi ring sor :
- ha. magedong-gedongan duk pangerempnian ibiang;
 - na. duk sang kamareka medal;
 - ca. kepus odel;
 - ra. roras rahina;
 - ka. tutug kambuhan (42 rahina);
 - da. nigang sasihin (3 sasih);
 - ta. pawetuan/otonan/odalan (6 sasih);
 - sa. tutug kelih (ngeraja swala wadone, ngembakin lanenge)
 - wa. matatah/mapandes;
 - la. mawiwaha;
 - ma. mawinten.
- (3) Upacara-upakara inucap nista, madia, utama manut sastra Agama Hindu lan dresta.

Palet 5

Indik Bhuta Yadnya

Pawos 54

- (1) Bhuta Yadnya inggih punika upacara-upakara byakala ring Pratiwi lan Kahyangang, sarwa prani saha upacara-upakara ring babuthan miwah ring piranti sewosan.
- (2) Upacara pabyakala ring sarwa prani, sarwa tumuwuh muwang piranti luwire :
- ha. Ring sarwa lelandep rikala Saniscara Kliwon wara Landep;
 - na. Ring sarwa tumuwuh lan piranti rikala Saniscara Kliwon wara Wariga;
 - ca. Ring sarwa syandana/wahana rikala Saniscara Kliwon wara Kuningan;
 - ra. Ring sarwa lelanguan rikala Saniscara Kliwon wara Krulut;
 - ka. Ring sarwa ingon-ingon/ wewalungan rikala Saniscara Kliwon wara Uye;
 - da. Ring sarwa ringgit, ukir-ukiran rikala Saniscara Kliwon wara Wayang;
 - ta. Upacara pakala-kalan manusa manut widana, kabawos pabyakala.

- na. Pawiwahan ring Desa Adat Nagi ngemanggehang pamargin sang purusa patut sang purusa/lanang ngambil rabi wantah adiri asapunika taler sang pradana/wadon, madrebe suami adiri kemawon.

Pawos 57

- Pidadab sang pacang mawiwaha punika patut sakadi ring sor :
- ha. sane sampun manggeh daha - taruna sakirengnyane mayusa 20 (duang dasa) tiben utawi sane sampun deha sakirengnya mayusa 17 (pitulas) warsa;
 - na. sangkaning sang purusa lan pradana madasar antuk suka lila;
 - ca. manut kecaping Agama (tan gamia gamena);
 - ra. mangde taler nganut ring daging undang-undang perkawinan.

Pawos 58

- Pidadab pamargin pawiwahan punika wenten sakadi ring sor :
- ha. Pepadikan (kamanggala antuk pakrunayan warga sang purusa);
 - na. Ngarangkat/ngarorod (memangi seeliben saking paumahan).

Pawos 59

- Tata cara pamargin pawiwahan ring Desa adat Nagi :
- ha. Pamargin indik papadikan :
 - 1) Kasanggra olih warga sang lanang lan san wadon;
 - 2) Makrunan tan lintang ping telu (3) manut tata cara raris pangambilan;
 - 3) Ritakala pengambilan warga lanang wiadin sang wadon patut ngarawuhang Klian Desa Adat/Klian Banjar Adat sane pacang ngilikitayang.
 - na. Pamargin indik ngarangkat/ngarorod :
 - 1) Mapasedek/mapajati tan kasepang ring awengi;
 - 2) Ngawentenang pangengkeban paling kidik 3 rahina;
 - 3) Ngamargiang pangalukuan ping tiga manut tata cara raris pangambilan;
 - 4) Yening wenten anak mapasedek/mapajati rahina dados kaandeg.
 - ca. Yan prade wenten pamargin indik ngarangkat/ngarorod ping 3 (tiga) makruna panglukuan durung kapuputang, wenang wargan sang ngambil rabi nyadekang pamargin pawiwahane ring Klian Desa Adat miwah sang ngawawenang mangde kapuputang.
 - ra. Krama sane nampi wong ngarorod/ngarangkat patut masadok ring Klian Banjar Adat tur Klian Banjar Adat netesang parindikan pamargin sang ngarorod punika.
 - ka. Yan wenten prade ngambil rabi siyos agama, sadurunge mabyakala patut ngawentenang upacara (sadi wadani) wus punika raris upacara pawiwahan.

Pawos 60

- Prade wenten sang lanang/suami mapikayun ngarereh rabi lintang adiri, patut madasar sakadi ring sor :
- ha. Wenten pasubayan, tur kawehin olih rabine pinih dumunan;
 - na. Sang istri nenten nyidayang ngalaksananyang swadarmaning dados istri;
 - ca. Sang istri madrebe cacad angga wiadin sungkan sane nenten dados kenak;
 - ra. Sang istri nenten dados madrebe sentana.
 - ka. Mangda taler nganutin ring daging undang-undang perkawinan.

Pawos 61

- Pawiwahan punika nenten dados lempas ring kecaping agama miwah sakadi dresta sane sampn mamargi :
- ha. Yan prade wenten (lokika sanggraha) patut digelis kasadokang, yan tan satinut nyakapang wenang sang lanang keni pamidanda, kasiarang ring desa tur ngupekarain bobotannyane.
 - na. Yan prade wenten mamitra ngalang lan sane siyosan patut digelis kasakapang. Yan tan satinut nyakapang wenang sang lanang miwah istri keni pamidanda tur kasiarang ring desa.

Palet 2

Indik Nyapian

Pawos 62

Palas pawiwahan :

- ha. Pawiwahan prasida kawusang utawi palas santuken sinalih tunggil wenten lampus utawi seda mapiteges balu.
- na. Palas marabian wenten sangkaning lila utawi wit wicara maprachihna tan malih suka panunggalang idep sang alaki rabi, mapiteges nyapihan.

Pawos 63

Sane pacang palas marabian mangda madasar sakadi ring sor :

- ha. Sang lanang utawi istri makarya lokika, sang rabi mamitra ngalang, miwah langsung siyosan yan tan dados kabecikang.
- na. Sang lanang utawi istri ninggal kadaton sasuwen-suwen (kalih) tiban tan mapasadok.
- ca. Sang lanang utawi ieri sang kaniya wit wicara satata wak purusya tan prasida malih adung.

Pawos 64

- ha. Sang palas marabian sakadi ring ajeng patut katiwakang pamutus ring Sang Rumawos sasampun polih pamutus tur marupa saksi pallikitan sang rumawos kabawos nyapihan.

na. Yan.....

- na. Yan sampun nyapihan tur kasahang olih sang rumawos wenang keni pamidanda. siarang ring banjar tur katurreksain indik pailikitan banjar tur

Pawos 65

- ha. Riwekas sang nyapihan malih adung tur malih jagi mawiwaha patut ngamargiang indik pamargin pawiwahan miwah ngalaksanayang upacara pawiwahan.
- na. Riwekas sang nyapihan malih adung, mapupul sakadi anak marabian ngantos pamargin miwah upacara pawiwahan patut digelis kasadokang olih Klian Banjar adat mangde kajangkepang, yan tan satinut nyangkepang sang lanang keni pamidanda, kasiarang ring desa tur ngupakara bobotannyane.

Pawos 66

- ha. Balu istri/luh katinggal lampus olih sang lanang tur kantung magenah ring wargan sang lanang patut ngamargiang swadarmaning kadi ring sor :
- 1) Ngamanggehang kapatibratan manut swadarmaning anak belu;
 - 2) Ngaraksa lan miarsa warisan lan sentanane;
 - 3) Tan dados ngadol warisan sadurung polih wak-wakan saking wargan rabine utawi kapurusa.
- na. Balu istri/luh tan pagedh swadarmaning ring wargan rabine saking purusa ngantos 6 (nem) sasih patut kabawosin olih warga purusa tur katur ring prajuru desa adat mangda kapuputang.

Palet 3

Indik Sentana

Pawos 67

- (1) Sentana wenten kalih pawos, sane kaucap pratisentana miwah sentana paperasan.
- (2) Pratisentana inggih punika sentana sane metu saking pawiwahan kapatut.
- (3) Prade pawiwahan tan kapatut ngawetuang sentana, mangda tan kantung kawastanin babinjat utawi astra patut kamanggala antuk panyangaskara.
- (4) Prade pawiwahan tan ngawetuang sentana kengin ngidih sentana antuk upasaksi sakala niskala sane kawastanin sentana paperasan.
- (5) Sentana rajeg inggih punika, pratisentana wadon (pradana) sane kamanggehang lanang (purusa) tur risampun ngalaksanayang pawiwahan kaceburin.
- (6) Sang sane dados kaarsayang sentana rajeg inucap wiwit angka (5), inggih punika :

ha Prati.....

- ha. Pratisentana wadon tunggal;
- na. Sampun kamanggehang dados pratisentana lanang (purusa);
- ca. Kapawiwahan kaceburin kautamayang olih jatma sane maagama hindu utawi jadma sane maagama siyosan sane sampun ngalaksanayang pamarisuda raga utawi sudiwadani;
- ra. Sane ngamanggehang sentana rajeg patut mapasadok ring Prajuru Banjar, tur I Klijan Banjar patut nyobyahang ring Banjar saha ngaturang ring Prajuru Desa Adat.

Pawos 68

- (1) Ngangkat sentana manut dudonan patut makacihna arta berana pamerasan sane kesaksiang sakala-niskala;
- (2) Sapa sira ugi krama pacang ngidih sentana patut masadok ring Bendesa sanistana 3 (tigang) sasih sadereng pamerasan. Bendesa ngalanturang pakaresa punika ring sang ngawa wenang;
- (3) Bendesa kawakilin olih Klijan-Klijan Banjar nyobyahang ring sawidangan Desa, sang sapa sira ugi rumasa tan lila mangda nyadokang masengker kalih uku (14 rahina) sabanen pamerasan ring Bendesa Adat;
- (4) Prajuru /Dulu Desa digelis mawosin saha ngicenin pamutus nepik ring catur dresta miwah pararem;
- (5) Prade sulur paperasan tan manut kadi kecap ring ajeng. Prajuru/Dulun Desa wenang ngandeg sang pacang meras saha ngicenin pamutus mangda kapuputang riyin babawos, sulur utawi wicaranya.

Pawos 69

- (1) Paperasan sane kapatut ring Desa risampun makacihna :
 - ha. Widi-widana paperasan;
 - na. Kasaksinin olih prajuru Desa sane makelingang utawi ngilikitayang.
 - ca. Kasobyahang ring wawidangan Desane.
- (2) Sentana paperasan kawastanin sah, polih pangesahan saking sang ngawawenang.
- (3) Ring panamaya upacarane, Klijan Banjar miwah Klijan Desa Adat patut kasinanggeh saksi utama tur katureksang ring adat pailikitannyane tur kasiarang / kasobyahang indik pamerasan punika, ring sangkepan banjar minakadi ring desa.
- (4) Sane kapatut peras angge sentana kadi ring sor:
 - ha. Jatma maagama Hindu.
 - na. papernahan nedunang saking sang meras ;
 - ca. Kulawarga saking purusa, prade tan wenten kengin sakeng wadon, yening taler tan wenten wawu kangin sakama-kama (saking kayun);
 - ra. Kautamayang saking waris pancer kapurusa;
 - ka. Sinalih tunggil mawiwit saking kulawarga tunggal sanggah utawi merajan, paibon lan dadia utawi ngambilin anak tios sakewanten sang maagama Hindu.

(5) Kengin.....

- (5) Kengin ngangkat sentana langkungan ring adiri, lanang wiadin wadon, prade ngangkat sentana lanang wadon, nenten dados kapawiwahang.

Palet 4

Indik Warisan

Pawos 70

- (1) Warisan inggih punika tetamian arta berana saha ayah-ayah ngupadi kasukerten sakala lan niskala saking kaluhurannya arep ring turunannya.
- (2) Kang sinanggeh warisan luwire:
ha. Duwe tengah, makadi tegal, ayahan Desa, Kahyangan, pusaka siwa pakarana lan sepanunggalanya;
na. Pamerajan;
ca. Pagunakayan, tadtadan / jiwa dana, hutang piutang.
- (3) Wawu kengin kabawos warisan prade wenten :
ha. Sang mapiturun (pawaris) ;
na. Katurunan (ahli waris) ;
ca. Arta berana miwah tategenan makacihna warisan.

Pawos 71

- (1) Ahli waris luwire :
ha. Pratisentana purusa ;
na. Pratisentana pradana (sentana rajeg);
ca. Sentana paperaan lanang/wadon.
- (2) Prade tan wenten sakadi ring ajeng, kang sinanggeh ahli waris :
ha. Turunan purusa pernah ngunggahang, rerama lanang, pekak salantur ipun rerama misan, mindon;
na. Turunan purusa pernah kasamping makadi kaponakan misan, mindon.

Pawos 72

- ha. Arta guna kaya : arta sane kabakta lan kakeniang olih soang-soang lanang istri saking pakaryannyane sadurung ngalaksanayang pawiwahan, sasampun pawiwahan mayusa 5 (lima) warsa dados arta druwe gabra.
- na. Arta druwe gabra : arta pakaryannyane lanang istri sane kakeniang sadaweg kantun alaki rabi.
- ca. Arta jiwa dana : arta sane kaicen/kawehin saking pangelingsirne marep ring sentanane lanang utawi wadon sadurung pawiwahan ritatkala pangelingsir kantun maurip tur kasahang/kapastikayang dados druwe ngaraga ngawawenang.
- ra. Arta pangupa jiwa : arta sane kicen/kawehin saking pangelingsir abosbos, anggen miara kehidupannyane, (Pamupune kamawon kambil).

ka. Arta.....

- ka. Arta pedum raksa : arta sane sampun kepeh/pamupune kemawon sane kepeh marep ring sentanane/pawaris, nanging kapungkuran durung janten pawaris ipun.
- da. Arta tatadan/babekelan : arta sane kaicen/kawehin (kabekelin) saking pangelingsir sane kantung urip marep ring sentene wadon/lanang ritatkala ngawitin pawiwahan tur kasahang olih sang mawarat.

Pawos 73

Linggih muang genah waris ring sentana :

- ha. Sentana lanang sane sah saking pawiwahan, patut dados ahli waris saking laluhurne/pangelingsirne, yan nenten ical hak ahli waris ipun.
- na. Sentana paperaasan lanang patut dados ahli waris pangelingsirne sane mameras, yan nenten ical hak ahli waris ipun.

Pawos 74

Linggih/genah waris ring anak balu :

- ha. Sane kangkat ngawaris pamupun kemawon :
 - 1) Balu istri/luh sane kantung manggeh ring wargan sang suami (nnten ninggal kadaton), tur nganutin swadarmaning anak balu;
 - 2) Sang mulih deha riantukan ring pawiwahan dumun sampun kaucep ninggal kadaton.
- na. Balu istri/luh sane ngidih ninggal kadaton/genah wargan sang lanang, wenang makta arta jiwa dana utawi arta tatadan/babekelan.
- ca. Balu luh/istri sane ninggal kadaton ten pasadok ring wargan rabine saking purusa ngantos 6 sasih nnten patut polih paham waris.
- ra. Balu lanang/muani sane katinggal lampus/seda olih sang rabi utawi istri wenang ahli waris arta jiwa dana, lan arta tatadan/babekelan rabine/istrine yan nnten wenten sasampune mayusa lintang ring 12 (roras) tiban. Yan sadurung pawiwahan mayusa lintang ring 12 (roras) tiban arta punika patut mantuk/dados ahli waris pangelingsir sang istri.

Pawos 75

Swadarmaning sang ngawaris :

- ha. Swadarmaning sang ngawaris patut nerima saha nguwasayang tetamian, ayah-ayahan, mamlara tur mangempon sakadi merajan/sanggah, pakarangan, pura dadia muang paibon.
- na. Ngalakeanayang upacara palebon/ngaben upacara pitra yadnya siyosan naur utang sakala lan niskala sang kawaris.

Pawos 76

Kaicalan kapatutan ngawaris :

- ha. sentana waris sane ninggal agama, tan patut malih ngawaris.
- na. sane kambil dados sentane paperasan tan wenang ngawaris malih ring witnyane.

Pawos 77

- ha. Prade wenten warga desa adat Nagi sane polih karang tur putungan sentanane, wenang Kliin Desa adat nitenin lan nureksa sila-silanyane, tur nibakang karang desa punika ring waris saking garis purusa ngunggahang utawi kasamping.
- na. Yan tan wenten ahli waris saking garis purusa, wenang karang desa punika katibakang ring sinalih tunggil warga pemerajan paibon/dadia sane kaputungan sentana.
- ca. Yan prade tan wenten sakadi ajeng, wenang Kliin Desa Adat mawosin tur nibakang ring warga desane siyosan sane tan madrebe karang paumahan sane malaluhur ring Desa Adat Nagi muah maagama Hindu.

Pawos 78

- (1) Prade sajeronin pakulawargan wenten ahli waris lengkungan ring adiri patut :
 - ha. kawentenang paigum indik pedum waris inucap;
 - na. yen tan prasida katunasang tatimbang ring Prajuru (kerta Desa);
 - ca. prade taler tan wenten cumpu ring panepas Kerta Desa, kengin katumusang ring sang Rumawos.
- (2) Prade karang inucap kaputungan, patut Prajuru/Dulu-dulu nibakang ring :
 - ha. sang sinanggeh ahli waris;
 - na. sang kengin anggen sentana;
 - ca. prade taler tan wenten cumpu ring panepas Kerta Desa, kengin katumusang ring sang Rumawos.
- (3) Prade jantos karang Desa kaepah utawi kasepih, patut soang-soang nedunin makrama Desa marep.

SAT SARGAH

WICARA LAN PAMIDANDA

Palet 1

Indik Wicara

Pawos 79

- (1) Sane wenang mawosin makadi mutusang wicara ring Desa inggih punika Prajuru / Dulu Desa sinanggeh Kerta Desa.

- (2) Tata dudonan mawosin saha muputang wicara warga desa kadi ring sor :
- ha. Kaping ajeng kabawosin olih Kelihan Banjar.
 - na. Tan cumpu ring panepas Kelihan Banjar, karerehang pamutus ring paruman banjar.
 - ca. Prade tan cumpu ring pamutus Banjar, katumusang ring Bendesa Adat lan Kerta Desa.
 - ra. Taler tan wenten cumpu ring pamutus Bendesa lan Kerta Desa katunasang ring Paruman Desa Adat.
- (3) Prade sang mawicara tan wenten cumpu ring pamutus paruman desa lan Kerta Desa, kengin nunasang wicara inucap ring sang Rumawos.

Pawos 80

- (1) Sahanan wicara mawiwit kacorahan saka luwire sinanggeh nungkasin daging Awig-awig, pararem miwah paswaran Desa/Banjar, Prajuru / Dulu patut digelis mawosin tan nyantos pasadok.
- (2) Sajaba wicara kadi ring ajeng patut nyentosang pasadok sang nunas bawos.
- (3) Panepase patut pastika nyantenang iwang patut malarapan Tri Pramana (saksi, ilikita, bukti) miwah tan maren nepek ring Catur Dresta.

Palet 2

Indik Pamidanda

Pawos 81

- (1) Desa/Banjar wenang niwakang pamidanda ring warga Desa/Banjar sane sisip.
- (2) Paniwak inucap kalaksanayang olih Bendesa/Klian Banjar.
- (3) Bacakan pamidanda luwire :
- ha. syahan panukun kasisipan;
 - na. danda arta;
 - ca. kanorayang;
 - ra. panyangaskara.
- (4) Pamidanda sane katiwakang patut masor singgih manut ring kasisipane.
- (5) Jinah utawi raja brana pamidanda ngaranjing dados druwen Desa/Banjar.

Pawos 82

- (1) Krama sane langkungan ring tigang paruman ngalantur tan nawur urunan miwah dadandan wenang karampag.

(2) Rerampagan.....

- (2) Rerampagan ngangge tata cara kadi ring sor :
- ha. Kalaksanayang olih Prajuru kasarengin olih Krama saakeha tigang diri maka saksi;
 - na. Sang ngarampang sangkanin darsana ngambil barang utawi nyawenin tanem tuwuh, akehnya manut ring utang sang karampag, sang karampag mangda lila nyuksershang barangnya sane dados wala;
 - ca. Prajuru/Dulu miteketang mangda barang-barang sane karampag digelis katebus, masenger awuku (7 rahina) ring kutus rahinane pacang kaadol;
 - ra. Tan nganinin saluwir barang sane patut inggilang manut Agama miwah tan mademang pangupa Jiwa sang karampag.

Pawos 83

- (1) Prade sang pacang karampag ngawara (ngalangin) palaksanaan inucap mawastu sampun tan nganutin Awig-awig Desa wenang karang Desa sane kagenahin kadaut olih Desane.
- (2) Samaliha yen purun taler ngalangin palaksanaan kadi ring ajeng tan wenten pamargi sajawaning kasepe kang olih Krama Desane.
- (3) Pamidanda inucap ring ajeng keni buntas risampun sang kakeninin :
 - ha. nunas geng pangampura ring Krama Desa riantukan nguak pasubaya (pararem) pecak;
 - na. nawur pangargan panguak pasubayane duk pacang karampag kadulurin pamrayaecitta panyapsap kalwangane ring Desa.

SAPTAMA SARGAH

NGUWAH - NGUWUHIN AWIG - AWIG

Pawos 84

- (1) nguwah-nguwuhin Awig-awig Desa puniki kalaksanayang ring paruman Desa.
- (2) Awig-awig puniki kamargiang ngawit kaingkupin (kararemin).

Pawos 85

- (1) Sakaluwirin sane wenten saderengnya patut kaanutang ring sadaging Awig-awig puniki.
- (2) Sakaluwiring sane durung kabawas sajeroning Awig-awig puniki patut kalaksanayang manut tata cara sane sampun mamargi kadulurin antuk pararem-pararem.

ASTAMA SARGAH

SAMAPTA

Pawos 86

- (1) Awig-awig puniki kararemin duk rahina Saniscara Wage Juluwangi pang 9 sasih VII Isaka 1918 tanggal Masehi 16 Desember 1995 ring wantilan Desa Adat Nagi.
- (2) Awig-awig puniki kalingga tanganin olih Bendesa lan Prajuru Adat, kasarengin Klian Banjar, saha kaseksinin olih Prajuru Dinas pinaka saksi.

(3) Luwir sang ngalingga Tanganin :

ha. Kaprathama Prajuru Adat :



2. Pangliman

(I Wayan Warea)

3. Klian-klian Banjar :

Klian Banjar Nagi

(I Made Suma)

na. Kaping kalih Prajuru Dinas pinaka saksi :




2. Kepala Desa Petulu



-33-

3. Camat Ubud



(Drs. Ida Bagus Ngurah Gede)

Mengetahui dan telah dicatatkan

Pada tanggal : 29 Februari 2000
N o m o r : 2 Tahun 2000



BUPATI GIANYAR



TJICKORDA GDE BUDI SURYAWAN. SH.